

西
沔
外
集

西匯外集

西滬外集卷第四

門人

新津童
成都宋寶
眉州劉鴻典
校刊
茲蟻

冰言補

學問

聖學專責人事專言實理

實理皆在萬物萬事之間聖賢之書不過摹寫其理讀書而

不知實理之所在何益之有

四書六經皆是吾身上自有的道理但聖賢先我而覺耳我

未覺所以要讀若不反身則皆成糟粕

夫所以讀書學問本以開心明目利於行耳未知養親者欲其觀古人之先意承顏怡聲下氣不憚劬勞以致甘腴惕然慙懼起而行之也未知事君者欲其觀古人之守職無侵見危授命不忘誠諫以利社稷惻然自念思欲效之也素驕奢者欲其觀古人之恭儉節用卑以自牧禮爲教本敬者身基瞿然自失斂容抑志也素鄙悒者欲其觀古人之貴義輕財少私寡欲忌盈惡滿調窮匱匱斂然愧恥積而能散也素暴悍者欲其觀古人之小心黜己齒敝舌存

含垢藏疾尊賢容眾茶然沮喪若不勝衣也素怯懦者欲其觀古人之達生委命強毅正直立言必信求福不回勃然奮厲不可恐懼也歷茲以往百行皆然縱不能醇去泰去甚學之所知施無不達世人讀書但能言之不能行之武人俗吏所共嗤詆良由是耳又有讀數十卷書便自高大陵忽長者欺慢同列人疾之如仇敵惡之如鴟梟以學求益今反自損不如無學也

窮理先從性情上窮起見得仁義禮智渾然具於吾心惻隱羞惡辭讓是非隨感而發就從此操存省察加以擴充此

便是源頭根本學問又於日用事物人倫莫不究極其所
以然明而禮樂幽而鬼神古今升降盛衰國家治亂存亡
民之所以安危兵之所以勝敗無不窮究方爲格物致知
之學

窮理非謂必盡窮天下之理又非謂祇窮得一理便到但積
累多後自當脫然有悟處

讀書一邊讀一邊體驗做做得一兩處到身上來然後諸處
漸湊得來久則盡湊得來

今日記一事明日記一事久則自然貫穿今日辨一理明日

辨一理久則自然浹洽今日行一難事明日行一難事久則自然堅固

道在天地閒不限於取數之多心力勤者得多心力衰者得少昏弱者一無所得

善學者如闢市求前摩肩重足得一步便進一步

已知如未知已能如未能則有進

天地萬物祇是一箇漸悠久所以成物悠久者漸之象久者漸之積天地萬物不能頓也而況於人乎故悟能頓成不能

頓

學者須要豎得這身子起

學者先收放心心境清明然後五官百骸得爲我用

每日檢點這念頭自德性上發出自氣質上發出自習識上
發出自物欲上發出如此省察久久自識得本來面目初
學最要如此

靜存動察在靜時爲尤要蓋此處工夫做得的當方分得理
欲界限明白若靜時工夫不到便照不見動時是非故存
養不得力連省察亦無下手處

學者祇是事事留心一毫不敢苟且德業之進也如流水矣

能辨真假是一種大學問世之所抵死奔走者皆假也萬古
惟真之一字磨滅不了蓋藏不了道也者道此也學也者
學此也

學問之道便是正也怕雜不一則不專不專則不精

知十而皆非真知不如知一者之爲真知也

有談虎傷人者眾莫不聞而其閒一人神色獨變問其所以
乃嘗傷於虎者夫虎能傷人人孰不知然聞之有懼不懼
則知之有真不真也學者之知道必如此人之知虎然後
爲至耳

後生才性過人不足畏惟讀書尋思推究者爲可畏耳

學貴知疑小疑則小進大疑則大進疑者覺悟之機也一番覺悟一番長進

師以質疑友以析疑師友者學問之資也若人人而學人人而問則人人皆師友矣何須受業何待定交

君子之學必好問問與學相輔而行者也自知其陋而謹護其失甯使學不終進不欲虛以下人此爲害於心術者大而蹈之者常十之八九不然則所問非所學焉問天下之異文鄙事以快言論甚且心之所已明者問之人以試其

能事之至難解者問之人以窮其短苟非是者雖有切於身心性命可以收取善之益求一屈己焉而不可得也嗟乎學之所以不能幾於古者非此之由乎
經書養人根本史書開人才思此事不可一日廢要自少年積之

見治則以爲治見亂則以爲亂見一事祇知一事何取觀史必如身在事中掩卷自思使我遇此等事當作何處之如此觀史學問可以進智識可以長方爲有益

學問之功聖人亦不敢廢不從學問中出任有掀天揭地事

業都是氣質作用一入聖賢秤尺坐定不妥貼

讀書自有讀書的道理俗所云書中自有千鍾粟黃金屋殆
謂讀書便可應舉應舉便可得官得官便可致富一切生
人之欲皆於是償之是直以官場爲利藪官實漁利之人
而讀書則皆羨魚結網者也如此讀書天下豈有真正讀
書人如此讀書人做官天下又安得有好官

學問之道至後世而寢衰寢微朝廷師儒之官下暨鄉曲之
老師宿儒教非所教以致受教之成人小子除制科文字
外大都一無所知求如古人之所謂經明行脩者千百中

不得十一而士之通籍策名者其操術亦概可知矣聖賢
脩己治人之方無一不原於學問士習一壞人心風俗政
治無不由之而壞有能奮然以興而不溺於流俗者謂非
豪傑之士乎

身心言行

人惟一心操之爲君子放之爲小人

思慮應接亦不可廢但身在此心合在此

人祇有一箇心如何分做許多去若祇管去閒處用了心到
得合用處於這本來的卻不得力

心有存主卽能宰制萬物

無事時心湛然在內有事時卽用這箇心去照應處置所以動靜表裏本末祇此一心心祇是箇一

心要如天平稱物時物忙而衡不忙物去時卽懸空在此祇恁靜虛中正何等自在

鏡空而無我相故照物不爽分毫若有一絲痕照人面上便有一絲若有一點癥照人面上便有一點差不在人面也
心體不虛應物亦然

舉世都是我心祇去了這我心便四通八達六合無一些界

限

人祇是心不放肆便無過差心不怠忽便無遺忘

無眾寡無小大無敢慢此九字卽毋不敬三字非但聖狂之分存亡治亂死生之關也必然之理也沈心靜應者始真知之

吾人所欠祇是涵養不純不定故言則失口事則恣意所行涵養得定總來祇是箇沈靜

沈靜非緘默之謂也意淵涵而態閒正雖終日言語或稠人廣眾中應繁劇而不害其爲沈靜神定故也

仁者其言也詎是持守得那心定恰似肚裏先商量了方說的模樣而今人祇是信口說方說時他心裏也自不覺得平居有意詎言還容易何也有意收斂故耳祇是當喜怒愛憎時發當其可無一厭人語才見涵養

言之當慎最是當快意時遇快意人說快意事

聞人過失如聞父母之名耳可得聞口不可得言也

口仁義而心利欲小人之尤也

可以理論而不可以利誘者其惟君子乎小人雖無所誘猶將趨之而況乎誘之

祇一箇利字把天下人都攪翻了祇一點利心把人一生都弄壞了

利者眾之所同欲也貪之甚則昏蔽而忘義求之極則爭奪而致怨

大利不換小義況以小利壞大義乎

盜跖非大盜也彼盜利而不盜名也世之大盜惟名利兩得者居其最

人千病萬病祇是要適意以奉承此血肉之軀

飲食男女人之大欲存焉人莫不欲白厚而不知其厚之所